



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

7. Kalenderwoche – ab 15. Februar 2009

Selbsd is dor Mann!

Nee, mir dud nischd weh, de Vordauung dud ooch einischormaßn klabbn, isch hab keene Behindorung... - wemmor ma jedzde von meinor Gudstn absähn wolln. Un die is ja ooch schon eene Schwährbehindorung!

Jednfalls - isch bin sähr seldn krank, abor wenn, dann isses sowieso meisdens dödlisch! Schnubbn odor Dinnbiff un sowas. Also, warum soll isch zum Arzd gehn? Sinnlos! Bloß um dor Ulla de Braxisgebiehr in dähn sozjaldemogradischn Rachn zu schmeißn? Nee! Un wensde nisch zum Arzd gehn dusd, dann kann dähr ooch nischd findn bei dir! Das is so. Sie kenn ja beschdimmd ooch dähn Schbruch - dasses keene gesundn Leide gehm dud, bloß welsche, die noch nie beim Arzd warn.

Nee, an mir kenn de Ärzde nischd vordien. Un fiehr dähn Fall dor Fälle... - vorsorschlisch habb isch mir ja selbor e umfangreiches medezynisches Fachwissn angeeischned. Vorbeuschend! Sie wissn ja, vorbeuschn is bessor, als wie riggwärds offn Arsch falln. Ja, ich weeß alles so ibor die Dinge, die disch gwältn kenn - digges Bluhd, dinne Närvn, Diedor Bohlen...

Nee, Schbaß beiseide. Du brauchsd ja heidzudaache bloß das endschbreschende Schdischword ins Indorned einzugähm - zum Beischbiel Härzschdillschdand - un schon erfährsde alles, was de wissn willsd daderdriebor. Un ooch das, was de nisch wissn willsd. Ehm alles!

So ibors Indorned habb isch misch off de Fähnrisse des Lähbens odor ooch des Ablähbens grindlich vorbereided. Un das dud sisch auszahln!

Zum Beischbiel kirzlich, wos misch widdorma erwischd hadde, eiskald un von hindn, da wussde

isch mir ehm soford zu helfn. Ja. Also, das war - da habb isch bledzlich un unerwarded nachm zwelfdn Schnabs - es war am schbädn Vormiddach - einen bohrenden Schmärz hinnor dor Schläfe vorschbierd. Isch dachde zuersd, isch bin beim Zahnarzd un dähr is villeischd mid seim Bohror abgerudschd - so wie das gebohrd had. Abor nee, so war das nadiehrlich nisch. Dähr Schmärz had ganz von alleene gebohrd. In solsche Fälle hasde ja nu vorschiedne Meeglischkeidn, schulmedezynisch zu reagiern. Baggungsbeilache läsn, Arzd frachn, odor dähn Abodheegor... Wobei fiehr misch Arzd frachn un so nadiehrlich nisch in Frache komm dud! Das däde ja sein, wie wensde in eenor fremdn Schdadt bisd un nisch weeßd, wo de hinmusd, un dädsd da gleisch jemand nachm Weesch frachn! Nee, so eenfach gehd das nisch! Dor rischdische Mann vorleefd sisich solange, bissor vorsähendlich ankomm dud!

Zum Gligg bin isch abor nu nisch bloß e Mann, sondorn ehm ooch e Eggsberde in Medezyn. Isch weeß mir ooch ohne Arzd un Baggungsbeilache zu helfn! Isch hab mir also nach reiflichor Iborleeschung eenfach noch een Schnabs - de nummero dreizn! - einvorleibd. Un was soll isch Ihnen sachn - weg war dor Schmärz! Wie weggeblasn! Nee, wens nach mir gehn däde, kennd mor de Ärzde allesamd in de Wiesde schiggn. Un de Ulla vorneweg!

Eduard Sachsenmeyer